

**Vorarlberger Landesarchiv, Urkunde Nr. 8566**

21. November 1564

Ich Ülin Brottscheling unnd Ich Gretha yssenbölzin Sein Eheliche Hausfrow Zu Thorenbüren unnd Im oberdorff gesessen Bekhennen offennlich für unuß alle unnsre Erben unnd nachkommen, unnd thun khundt Allermenigclich mit disem Brieff Das wir mit verbintenen guetem wyllen, wolbedachtem Synn unnd Muoth Zu fürderung unnsers Nutz, Besonder mit Hannd der Erbern unnd beschaidnen Sebaistion Hubers unnd Hanßen albrichs den Man nempt Waybel, Als unnsere gewaltt Haber, uffrecht unnd redlich verkhoufft unnd zu khouffen gegeben haben Ains stetenn vesten Eewigen unnd ymer werennenden Kauuffs unnd geben Auch Alß In Crafft ditz Brieffs, Dem Edlenn unnd vesten Hannsen Stockhornner, Als weylundt des wollgebornnen Herren Her Hannybals Herr von Zinzendorff Erb Jegermayster In Österreich, gewalt Haber unnd allen seinen Erben unnd nachkommen Nemlich unnsrer Aigen Hauß unnd Hofstatt Im oberdorff gelegen stosst zu der ersten Sytten An des Herrn von Zinzendorff aigen gutt Zum anddern an die Gassen, unnden an Hannsen Salzmann den man nempt träger unnd zum vierdten an den Stainnibach Ales mit grund grat genngen stegen unnd wegen, unnd gemainlich mit allen Anderen seinen Rechten unnd Zugehörden benempton unnd unbenempton, Auch für frey Ledig unnd gegen Allermenigclich unverkhumbert. Unnd ist Also der Eewig Redlich kouff erganngen unnd Beschechen umb Fünffunnd Zwaintzigkh guldin Reinisch In Muntz guotter unnd genemer ditz Lanndts werung dero wir alle gar von Ime dem kouffer Erberlich Außgericht unnd bezalt worden sind, nach unnsere gutten wyllen unnd benüegen unnd die an unnsere guoten nutz kemmen unnd gewendt Sind. Unnd hieruff dits Eewigen Redlichen Kouffs wie vorstat, sollen unnd wollen wir die vorgedachten verkeuffer all unnsere erben unnd nachkommen des genannten Keuffers Aller Seiner erben unnd nachkumen recht gutt getreuw Krefftig gewerren, fürstandt, unnd versprecher gegen Allermenigclich sein Noch recht wa wir wenn, oder gegen wem Sy des an gaystlichen oder weltlichen Gerichtenn ymer bedürffen oder Notturfftig werdenn Allfort in unnsere Aigen Costen, on Irn schaden, bey unnsere waren unnd guotten Trewen, on All widerred ußzug unnd guerd. Unnd des Zu warem Urkhundt haben wir obgenannte verkeuffer mit fleys unnd Ernnt erpetten den Ersammen Jacoben Böschen der Ziet Aman Zu thorenbüren das er sein Aigen Innsigel für unuß unnd unnsere erben (.doch Ime unnd Seinen Erben on schaden.) offennlich an disen brieff gehenckt hatt, der geben ist Am nechsten Zinstag nechst vor Sant Khathrinatag nach Cristi gepurt Als man Zalt thusend Fünffhundert Sechzig und vier Jar.

**Rückseite:**

Khauffprieß umb Fidin Ullin Hoffstadt Zu Thorenbüren ann dato Zinstag Vor Catarina Anno 1564